

谢王立之送蜡梅五首

宋 晁补之

一

未教落素混冰池，且看轻黄缀雪枝。
越使可因千里致，春风元自未曾知。

二

恐是凝酥染得黄，月中清露滴来香。
定知何逊牵诗兴，借与穿帘一点光。

三

上林初就召群臣，紫蒂同心各自新。
谁见小园春雪里，破春一萼更惊人。

四

诗报蜡梅开最先，小奁分寄雪中妍。
水村映竹家家有，天汉桥边绝可怜。

五

去年不见蜡梅开，准拟新年恰恰来。
芳菲意浅姿容淡，忆得素儿如此梅。